

Una pillugu siunnersuut: Imaanut aqqartartut suliaqarneq aqqartartullu atortui il.il. pillugit inatsisip allannguutai pillugit inatsisip Kalaallit Nunaannut atortuulersinneqarnissaanik kunngip peqqussutaa pillugu Kalaallit Nunanni Namminersorlutik Oqartussat oqaaseqaataat pillugu Inatsisartut aalajangiinissaat
(Ineqarnermut, Sanaartornermut Attaveqaatigiinnermullu Naalakkersuisoq)

Saqqummiussissut

(Ineqarnermut, Sanaartornermut Attaveqaatigiinnermullu Naalakkersuisoq)

Siullermeerneqarnera

Takornariartaassuit Kalaallit Nunaannut tikittartut amerliartornerat sulilu amerlanerusut tikittalernissaanik naatsorsuutiginninneq Kalaallit Nunaata imartaani imakkut angallannermi isumannaallisaanerup annertuutigut sukateriffigineqarnissaanik naalakkersuinikkut kissaateqarnermik nassataqarsimapput. Taamaattumik Folketingip imarsiornerneq pillugu inatsisip inatsisillu assigiinngitsut allat allannguutissaat pillugit inatsisissatut siunnersuutit akuerisimavai. Naalagaaffiup Sinniisaata imaanut aqqartartut suliaqarneq aqqartartullu atortui il.il. pillugit inatsisip allannguutai pillugit inatsisip Kalaallit Nunaannut atortuulersinneqarnissaanik kunngip peqqussutaa Søfartsstyrelse sinnerlugu nassiuppaa.

Aqqartartut suliaqarneq aqqartartullu atortui il.il. pillugit inatsisip allannguutaa pillugu inatsisip imaanut aqqartartut allagartartaarniarneq allagartamillu attassiinnarnissaq pillugit malittarisassat pisariillisarneqarnerat aamma Danmarkimi inuussutissarsiornermut ineriartortitsinermullu ministeri pisortani oqartussaasunut qarasaasiakkut attaveqartarneq pillugu malittari-sassanik aalajangersaanissamut periarfissaasa annertusineqarnerat ilaatigut nassataraa, kiisalu inatsisip allangortinneqarnerata “Dykkerråd”-imik atorunnaarsitsineq nassataraa.

Imaanut aqqartartut suliaqarneq aqqartartullu atortui il.il. pillugit inatsisip allannguutaa pillugu inatsisip Kalaallit Nunaannut atortuulersinneqarnissaanik kunngip peqqussutaa aalajangiiffigisassatut siunnersuummut 75 aamma 76-mut attuumassuteqarpoq.

Tassa imaappoq aalajangiiffigisassatut siunnersuutit taakku ataatsimoortumik inatsisiliat ilagigaat, malittarisassat Kalaallit Nunaata imartaani immakkut angallannermi isumannaallisaaneq pillugu piumasaqaatinik sukaterisoqarsinnaalersitsisut Kalaallit Nunaannut atortuulersinneqarnissaat siunertaralugu.

Peqqussutit taakku Kalaallit Nunaannut atortuulissasut Inatsisartut aalajangerpata tamatuma kingornatigut nalunaarutit 2016-imi umiarsuit takornariartaatit atorlugit takornariartitsinermi atulersinneqassapput. Taamaattorli suliniutit ilaat eqqarsaatigalugit piffissaq ikaarsaariarfiususaaq sivisunerusinnaavoq. Nalunaarutit taakku Kalaallit Nunanni Namminersorlutik Oqartussat aamma imarsiornermut tunngasunik soqutigisallit suleqatigalugit suliarineqassapput.

Siunnersuut taamatut oqaaseqaateqarlunga Inatsisartuni akuersaartumik oqaluuserisassanngortippara.